



Igl artist Tarcisi Cadalbert alla lavur.

FOTO MAD

## Aquarels nunenconuscents da Tarcisi

La galleria Zezzaneera el marcu vegl a Glion muossa ovras da Tarcisi Cadalbert entochen l'entschatta fenadur 2026.

En ses aquarels ha igl artist oriund da Sevgein ch'ei morts 2003 tematisau denter auter la muntogna e la natira dalla Surselva.

HANS HUONDER/FMR

Igl artist Tarcisi Cadalbert ch'ei naschius a Sevgein ha viviu da 1943 entochen 2003. El era enconuscents sco Tarcisi ed ei sefatgs prominents sco pictur ed artist d'acziun. En si'emprema fasa da lavur sco artist eis el sededicaus alla pictura d'aquarel. Da quei temps dat ei in tschuppel ovras ch'ei aunc mai vegnidas musadas publicamein. Cull'exposiziun ella galleria Zezzaneera el marcu vegl a Glion semida quei. Gievgia, ils 26 da mars 2026 ei la vernissascha da quell'exposiziun. *Bea König* e *Nicoline Schaub* che meinan comunablamain la Zezzaneera realiseschan quell'exposiziun culla Fundaziun Tarcisi. Quella ei vegnida fundada igl onn 2021 dalla niaza da Tarcisi Cadalbert, *Eveline Spescha-Cadalbert*, e da siu consort *Armin Spescha*. «La finimira dalla fundaziun ei da tener en memoria la lavur ed igl art da Tarcisi, sco era da conservar sias ovras», scrivon las menadras dalla Zezzaneera en ina communicaziun als mieds da massa.



Ina da plirs lavurs d'aquarel da Tarcisi Cadalbert.

FOTO MAD

Tages-Anzeiger. Duront quei temps eis el sededicaus pli e pli agl art. El ha fatg quei a moda autodidactica. Naven da 1979 ha el luvrau sco artist liber. En si'emprema fasa da lavur artistica ha el malegiu cun la tecnica d'aquarel. Ses sujets: la muntogna e la natira dalla Surselva. «Cugl aquarel ha el saviu experimentar cun

glisch, aua e pigments da tuttas colurs. El ei se-retrats els cuolms nua ch'el ha anflau il ruas. Quel ha el duvrau per sviluppar siu agen lungatg da malegiar», constatescha la Zezzaneera. Ils aquarels da Tarcisi da siu emprem temps dalla pictura fuorman in'atgna gruppa d'ovras. «Igl ei maletgs impressiunonts. Igl ei lavurs d'in artist sincer, empatic, rebelic e sensibel», constateschan *Bea König* e *Nicoline Schaub*.

### Diferents products

Parallelmein sper l'exposiziun offerescha la Zezzaneera in kiosc. El ei ina part integrala dil concept d'exposiziun. Ell'exposiziun da Tarcisi vegn purschiu products da Turitg, il liug da dimora che Tarcisi Cadalbert haveva eligi. Medemamein sa vegnir cumprau cartas d'art da maletgs d'aquarel producidas en Surselva.

**Ulteriuras informaziuns:** [www.tarcisi.ch](http://www.tarcisi.ch). La vernissascha ha liug gievgia, ils 26 da mars 2026 dallas 18.00 entochen las 20.00. La finissascha ei venderdis, ils 3 da fenadur 2026 dallas 16.00 entochen las 18.00. La Zezzaneera a Glion ei aviarta mintgamai gievgia e venderdis dallas 14.00 entochen las 18.00 sco era la sonda dallas 11.00 entochen las 16.00.

## TRUN

### Um grev blessau en consequenza d'in accident da lavur

Il gliendisdis avonmiezdi ei in luvrer seblesaus grevamein vid ina maschina da splanar a Trun.

Sco quei che la Polizia cantunala dil Grischun scriva en ina communicaziun als mieds da massa era in um ella vegliadetgna da 25 onns vid luvrar vid ina maschina da splanar gliendisdis avonmiezdi avon las 08.30. Siu maun dretg ei vegnius trats egl avanzader dalla maschina. El ha saviu trer ora sez il maun. Conlvrers han prestau igl emprem agid. Suenter il providiment medicinal d'in team dil Survetsch da salvament Surselva, in miedi ed in'equipa dalla Rega ei igl um blessau vegnius sglaus dalla Rega el Spital cantunala dil Grischun a Cuera. Per assister als conlvrers ei il Care Team Grischun staus en survetsch. La Polizia cantunala dil Grischun sclarescha ils motivs digl accident. (cdm/fmr)



Il luvratori nua ch'igl accident ei capitau.

FOTO POLIZIA CANTUNALA

## SAGOGN

### GIE al Revier forestal Gonda

La vischnaunca da Sagogn ha acceptau la fundaziun dil menaschi forestal Revier forestal Gronda. La decisiun unanima ei curdada alla radunonza communal il venderdis sera ella halla plurivalenta. Al Revier forestal Gonda separticipeschan era las vischnauncas da Laax e Falera. Schluein ha decidiu da buca separticipar al revier. Alla radunonza communal dils 12 da december 2025 haveva la vischnaunca da Sagogn gia decidiu la reorganiziun dil revier forestal. Ussa ein ils statuts leutier vegni acceptai.

Vischinas e vischins da Sagogn han era approbau il venderdis la proposta dalla suprastanza communal da conceder 295 000 francs pil remplazzament dalla punt dalla Val Mulin. Il project dalla punt stat en connex culla reconstrucziun dalla senda da viandar atras la Val Mulin. (cdm/fmr)



Vischinas e vischins da Sagogn han acceptau ils statuts dil Revier forestal Gonda.

FOTO AUGUSTIN BEELI

## Viver en cuminonza a Castrisch

A Castrisch vegn baghegiu actualmein ina casa cun pliras habitaziuns che duei daventar dapli che mo in spazi da habitar. Ella casa che senumna «Staziun 16» e che consista d'ina part veglia ed ina nova dat ei siat habitaziuns modernas. Il possessur Hansueli Baier discuora d'ina casa da generaziuns che duei porscher spazi da habitar pagabel a Castrisch.

RTR/FMR

A Castrisch sut la baselgia viers la staziun vegn actualmein realisada ina casa da pliras habitaziuns. Igl edificiu consista d'ina part veglia e d'ina nova. Ils habitonts dalla casa «Staziun 16» survegnan sper lur siat habitaziuns modernas da 2,5 entochen 6,5 stanzas era in spazi public che cumpiglia denter auter ina cuschina cun access direct egl iert, dus plazz da coworking e perfin ina biblioteca. E tut quei cun tscheins-casa da denter 1500 e 2400 francs.

Ina immobilia cun in'atmosfera anonima fuss mai vegnida en damonda, di igl investur ed anteriur hotelier *Hansueli Baier*. «Jeu vesel la situaziun a Cuera. Leu dat ei fetg biaras casas d'ina famiglia ch'ei habitadas mo d'ina persuna. Era jeu hai ina da quellas casas a Cuera. Jeu vules bu-

ca vegnir vegls en ina da quellas, mobein saver midar en ina cuminonza pli gronda. E quei ei daventau cheu a Castrisch.»

### Bia da lenn

La casa nov-construida digl l'architect indigen *Jan Berni* ei fatga cun lenn grischun e corrispunda al standard d'ina casa passiva. Grazia a grondas finiastras e materials stgirs vul igl architect trer a nez l'energia dil sulegl. Perquei eis ei pusseivel d'instalar in scaldament da lenna pli pign. La construcziun en lenn possibilitescha era ina gronda flexibilitad enteifer las habitaziuns. In ni l'auter «mir» san ins senz'auter schar naven ni spustar, sch'ins vul.

### Las biaras habitaziuns gia affittadas

La gronda part dalla habitaziuns ein gia naven. Ei dat denton aunc la schanza da

survegnir ina ni l'autra. Pil possessur Hansueli Baier dat ei criteris impurtonts per formar ina cuminonza. «Il mix dalla cuminonza ein affittaders ni affittaders che han ina relaziun cun la regiun dalla Surselva. Ed en secunda lingia ei naturalmein era il lungatg romontsch in criteri per la cuminonza da quella casa. Jeu mez sun era gest vidlunder d'emprer romontsch.»

Il lungatg e la cultura colligian era en ina cuminonza da habitar. Igl investur Hansueli Baier giavischa ina cuminonza cun famiglias giuvnas e persunas attempadas che habiteschen ella casa cul num «Staziun 16». Ils emprems affittaders vegnan a reter lur niev da casa all'entschatta digl onn da scola 2026/27. Entochen igl atun 2026 ei igl entir project a fin.



La casa «Staziun 16» (visualisaziun) a Castrisch duei porscher spazi da habitar pagabel per pliras generaziuns.

VISUALISAZIUN MAD